

HOTEL SCHWEIZERHOF LAI: giubileum da 30 onns per Andreas e Claudia Züllig

Fatg an chels onns 900 000 pernottaziuns

G.N.S. Igl 1991 on Andreas e Claudia Züllig surpiglia igl hotel Schweizerhof a Lai. Dumengia passada è stada l'amprem'occurrènz da chel giubileum. Durant en onn dattigl adegna puspe occurrenz pigl giubileum da 30 onns, tgi igl pèr magna cun bler cor la tgesa da quatter steilas.

Sch'ins discorra digls hotels da Lai, alloura dastga en nom betg mantger. Chegl è igl Schweizerhof, situo anmez vischnanca e cun Andreas e Claudia Züllig scu hospitants gentils. Igl Schweizerhof è egna dallas bungas adressas tgi dat aint igl Grischun ed igl hotel da quatter steilas ins canoscha er gliunsch sur igls cunfegns digl noss cantun. Igl 1991 cura tgi Andreas e Claudia Züllig on surpiglia chella tgesa ò ella gia onns pi turbulents cun er ples concurs. Siva da lò è igl hotel s'avanzo tar egn da chels cun en bung nom, cun hoteliers tg'on mano serious igl travagl, vurdo bagn dallas finanzas, digls giasts ed er digls ampluias. Igl anvien ò igl hotel Schweizerhof vers 120 ampluias. Da menziuanr è tgi igl Schweizerhof a Lai datescha digl 1904 ed è uscheia egn digls hotels igls pi vigls tgi vagn aint igl Grischun. Tgi Andreas Züllig, igl patrung è ena persunga cumpetenta, fidada e digl rom conferma bagn er tg'el è siva digl 2014 president da «hotelleriesuisse», l'associazion naziunala tgi reunescha igls hoteliers e hotels dalla Svizra.



Magnan comunabel igl hotel Schweizerhof. (da san.) Christian Zinn, Claudia Züllig ed Andreas Züllig.

Ferm contact tar l'agricultura

I seian daveiras stos 30 bels ed interessants onns, deian Andreas e Claudia Züllig. An chel taimp ins vegia dastgea retschever blers e cunzont er fitg bungas giasts, betg angal giasts svizzers, er blers digl exteriour. An chels treis decennis èn blers digls giasts er davantos ameis dalla famiglia Züllig ed er digl hotel sez. Oz totga igl hotel Schweizerhof tar egn digls miglers hotels per famiglias, vot deir famiglias tgi pon er sa lubeir da far vacanzas ainten ena schi bunga tgesa, ena tgesa noua tgi igl

giast è propi anc igl rètg. Igl pèr tgi magna ossa gio 30 onns cun bler angaschamaint la tgesa da quatter steilas ò an chels onns er adegna tschartgea igl contact tigls producers, do adegna daple peisa agl products regiunals per esser tant scu pussebel autentic. Andreas e Claudia Züllig on er adegna tgiro igl contact tar l'agricultura, pigl pèr en aspect da gronda valour. Ansomma on el ed ella adegna tschartgea da risguardar furnitours dalla regiun, da collaborar cun producers dalla regiun e da perscher igls products er agls giasts digl hotel.

Investo 45 milliuns francs

An chels 30 onns tgi Andreas e Claudia Züllig èn hospitants digl Schweizerhof èn er neidas investadas belas sommas per renovar, modernisar e cumplettar igl hotel. An chels treis decennis èn nias investos 45 milliuns francs, chegl ple u manc adegna per bagn digl giast. Scu tgi Andreas Züllig ò detg vegia igl Schweizerhof fatg an chels 30 onns en stgamiamaint brut da 260 milliuns francs. An chels blers onns vegia igl hotel tuttegn fatg 900 000 pernottaziuns, er chegl ena bela cefra. Las festivitads da 30 onns cozzan anc anfignen igl aton 2021. L'amprema occurrenz è neida anromada cun cant da bellezza digl Chor Incantanti sot la direcziun da Christian Klucker. A pled è pero er nia igl actour Gian Rupf, tg'ò fatg en viadi tras l'istorgia digl Schweizerhof. Dalla cuschna ègl alloura do angal igl migler ed igl pi bung, chegl tgi totga siva da 30 onns tigl hotel Schweizerhof.



Dalla parteida alla festa er igls dus fegls digls hoteliers. (da san.) Gian Andrea Züllig, Adriana Casutt e sies partenari Nico Züllig.

Losch d'aveir bungs hotels

Sto anvido all'occurrènzia inziala digl giubileum da 30 onns tgi igl pèr Züllig magna igl hotel Schweizerhof, è er Aron Moser, igl mastral digl cumegn da Vaz. El dei tgi Lai e Valbella dastgan esser loschs d'aveir fitg bungs hotels da quatter steilas, tgesas cun ena lunga tradiziun, blers giasts fidevels e cunzont cun hoteliers tgi tgapeschan lour mastier. Mintga hotel seia da grond'impurtanza per la desti-

naziun da vacanzas da Lai, dei Aron Moser. I dovra hotels pi gronds scu igl Schweizerhof, pero er hotels pi pitschens ed er hotels da famiglia. Betg mintga li turistic seia ainten la situaziun ventirevla d'aveir schi bungs hotels scu Lai e Valbella. Igl hotel Schweizerhof chel seia per Lai er ena tgesa cun en grond effect da reclama sen camp naziunal ed er internaziunal, punctuescha igl mastral digl cumegn da Vaz.



Mila Pesko, igl pi gioven giast tar la festa da giubileum.



Igl hotel Schweizerhof a Lai ena tgesa da gronda tradiziun.



Ò mano tras igl hotel: igl actour Gian Rupf.



Urs Heinz Aerni (san.) è responsabel per las occurrenzas culturalas aint igl hotel. Cò an discours cun Aron Moser, igl mastral digl cumegn da Vaz.



Cant da vaglia digl Chor Incantanti (terz da san.) Andri Simeon.



Bungs vaschigns dalla famiglia Züllig: Lara e Nico Pesko digl affar da sport Pesko.



Gery Nievergeld (san.), capo-redactour dalla gasetta Hotelrevue e Guglielmo L. Brentel, igl anteriour president da Hotelleriesuisse èn er stos anvidos alla festa da giubileum. Fotos Gion Nutegn Stgier